

Jordak zuzenduko du Euskadiko Sinfonikoa bihar eta etzi

DONOSTIA

Enrique Jorda musikari donostiarrak Euskadiko Orkestra Sinfonikoa zuzenduko du bihar eta etzi, apirilak 1 eta 2, orkestra honek Miramonen duen egoitza nagusian egingo dituen emanaldi berezietan. Enrique Jorda Euskadiko Orkestra Sinfonikoko ohorezko zuzendari da 1983az geroztik. Izendapen horrekin, orkestra sortzeko lanean egindako ahaleginak eta orkestra sortu zenez geroztik honen alde agertu duen jarrera eskertu nahi izan zioten.

Imanol Olaizolarekin batera ekin zion Enrique Jordak Euskadiko Orkestra Sinfonikoaren osaketa lanei, eta Irunen—Ametza abesbatzarekin batera eta Nicanor Zabaleta harpa jolearen laguntzaz—egindako kontzertua zuzendu zuen 1982ko ekainaren 24ean, artean Euskadiko Orkestra Sinfonikoa bere estreinaldi ofiziala egin gabe zegoenean. Urte horretako urrian egin zituen orkestrak bere aurkezpen ofizialeko emanaldiak, EAEko hiru hiriburuetan.

GURIDIREN LANARI LOTUA

1937an euskal artisten lana mundu osoan zehar barreiatu zuen Eresoinakako partaide izan zen egun 82 urte bete berriak dituen musikari eta maisu donostiar honek.

Jesus Guridi konpositore arabar ezagunak Enrique Jordari eskaini zion bere 'Diez melodías vascas' obra. Jorda bera izan zen obra hura Madrileko Monumental zinema aretoan estreinatu zuena, 1941eko abenduaren 12an. Harrezkero lan honekin oso lotuta sentitu izan da Enrique Jorda beti.

Obra hau bera emango du, hain zuzen ere, Euskadiko Orkestra Sinfonikoa bihar eta etzi, Enrique Jordaren zuzendaritzapean egingo dituen emanaldietan.

Arabako Museoak daukan leku falta konpontzeko esan dio Diputazioari

Fondoetan 1.500 obra ditu baina 350 besterik ez ditu erakusten

Arabako Museoaren Adiskideen Elkarteak sortzeko batzarra iragan igandean egin eta leku faltaren inguruan konponbidea emateko Diputazioari eskatzea erabaki zuen. Museoak 1.500 obra ditu fondoetan, baina era iraunkorrean 350 erakusteko lekua dauka soilik.

LUIS KARLOS GARCIA / GASTEIZ

Joan zen igandean Arabako Arte Ederretako Museoaren Adiskideen Elkarteak (AMBA) sortzeko batzarra egin zuen Gasteizen. Era horretan, elkartearen eratzea guztiz amaiturik dago, estatutuak egin eta onetsi eta zuzendaritza izendatu ondoren.

Batzarraren arlorik garrantzitsuen Pedro Ramos Arabako Foru Aldundiko Kultura diputatuari eskutitza bidaltzea erabakitzea izan zen. «Elkartearen beharrik premiazkoenen» berri ematen du gutunak. «Ondare fondoak behar bezala erakutsi ahal izateko leku faltaren ondotik arte garaikideari buruzko bilduma merezi bezala ikusterik ez dago», argudiatu dio elkarteak Pedro Ramosi.

Bestalde, AMBAren aburuz, museoak dituen bildumak «oso heterogeneoak» izatea da beste arazo bat, «arte ederrak, joko kartak, txanponak eta Amari Fundazioari dagozkion bildumak ere agertzen baititu».

Donizettik itxiko du ABAOren denboraldia

BILBO

Bilboko Operaren Lagunen Elkarteak (ABAO) Donizettiren 'Lucia di Lammermoor' opera aukeratu du 1992-93 denboraldiari amaiera distiratsua emateko. Lucia Alberti sopranoa, Marcello Giordani tenorea eta Alexandre Agache baritonoak hartuko dute parte, rol nagusietan, ABAOren denboraldia itxiko duen emanaldi honetan, gaur, arratsaldeko 20.00etan, Bilboko Coliseo Albian. Gaurko emanaldiaren ondoren, apirilaren 3an eta 6an obra hau berriro ikusteko aukera izango da toki berean.

Bigarren mailako rolak Carlos Striuli eta Jose Antonio Urdiain bilbotarrak egingo dituzte. Instrumentazioa Euskadiko Orkestra Sinfonikoaren esku izango da. Eszenografia Giampaolo Zenarok landu du, eta zuzendari lana, berriz, Antonello Allemandiren ardura izan da.

ARIA ETA DUOA

Allemandik prestaturiko emanaldian, Lucia-ren aria eta tenorearen eta baritonoaren arteko duoa entzuteko aukera izango da, pasarte horiek emanaldirik gehienetan baztertu egiten badira ere Coliseo Albiakoetan eman egingo baitira.



AMBA joan zen igandean egindako batzarrean sortu zen.

OLALDE

GESTIO TXOSTENAREN BERRI

Iragan igandeko batzarrean orain arteko gestioari buruzko txostena azaldu zuten. Egun egiten ari diren jardunaldiak, ARCOko azokan jarritako stand-a eta erakunde publiko nahiz pribatuarekin izandako zenbait harreman jaso ditu aipatu txostenak.

Bestetik, Museoaren Adiskideen Elkartearen jomugei dago-kienez, «gizarte eta museoaren arteko lotura zuzena» izan nahi du AMBAk, baina orobat, museoaren interesen alde jotzeko presio talde gisara egin nahi dugu lan», aditzera eman zuten bertoko bozeramaileek. Azpimarretzeko da elkarte honek oraingoz 80 kide dituela.

LABURREAN

POESIA

errezitaldia gaur Azpeitian

Jose Luis Otamendi eta Iñigo Aranbarri poesia errezitaldia egingo dute gaur, arratsaldeko 20.00etan, Azpeitiko Enparan dorre etxean. AEK-k Korrika Kulturalaren barruan antolatu dituen ekitaldi ugarietako bat da gaurko errezitaldi hau. Jose Luis Otamendi eta Iñigo Aranbarri poeta ezagunak dira, Azpeitiko bata eta azkoitiarra bestea. Susa argitaletxearen bidez eman izan dituzte euren poema libururik gehienak.

AAURRESKU

txapelketa igandean Besainen

Gipuzkoar erako II. Aurreku Txapelketa jokatu da datorren igandean, apirilak 4, eguerdian, Beasaingo Loinazko San Martin enparantzan. Txapelketa honetan 7 eta 15 urte bitarteko dantzariak hartu ahal izango dute parte, bi sailetan banaturik: 7tik 11ra bitartekoak B sailean, eta 12tik 15era bitartekoak A sailean.

TRITILARI gazteen diskoa kaleratu du Elkar-ek

Maixa eta Itziar eta Iker eta Larraitx, bi trikitilari bikotek disko bat osatu dute, eta Elkar argitaletxeak argitara eman. Gazteak dira baina plaza askotan arituak dagoeneko. Fandango, rantsera, bals edota rap bat ere badura diskoan. Euren gain, Jon Sarasua, Joxan Ormazabal eta Carlos Subijana hitzak musikatu dituzte.

MUSEOEN sarrera oraindik doakoa izango da

Espainiako museoetara sartzeko oraindik ez da dirudik ordaindu beharko. Horrela adierazi du Espainiako Kultur ministroa den Jordi Solé Turak Legebiltzarrean. «Ez dago presarik museoetan sarrera ordaindua jartzeko oraindik». Europako Komunitatea sarrera jartzearen alde agertu da baina, lege hori oraindik ez dago indarrean, aurka agertu diren jarrerak direla eta.

IRAGARKI MERKEAK (943) 46 90 22

31 x 15 mm

EGUN BAT 1.040 pta/42l.
ASTEBETE 5.100 pta/208l.
BI ASTE 9.000 pta/360l.

31 x 33 mm

31x33
MODULO

EGUN BAT 2.100 pta/84l
ASTEBETE 10.200 pta/416l
BI ASTE 18.000 pta/720l
HILABETE 25.000 pta/1.010l

31 x 33ko
BI MODULO

EGUN BAT 4.200 pta/168l
ASTEBETE 20.400 pta/832l
BI ASTE 36.000 pta/1.440l
HILABETE 50.000 pta/2.200l

